

《Fouxcaemzgvej》Bouxcuengh:

Baijyienj “Feihyiz” Gijyinx Gagmiz

展示“非遗”独具魅力的壮族《蚂拐舞》

□ Denz Dazvanh Cinz Cwngh



▲ Foux goepgvej gaebdawz nonhah bauj fungsou.



▲ Foux goepgvej yatdiuq viengh ak raeuh.

▲ Cietcaemzgvej Nazdung Cunh Denhgoz nauhvied raeuh.



▲ Diuq foux dwkbya lauz-gungq hoh fungsou.



▲ Foux ndaemnaz yiengh caenlili.



▲ Foux goepgvej yat coemj nonhah.

Youq Denhgoz、Nanzdanh、Dunghlanz、Fungsanh doengh dieg ranghdah Dahraemxhoengz baihsaebaek Guengjsae raeuz, moix bi ndwencieng cungj banh ciengz hozdung cienzdoengj hoenghhwd youh daiq miz eiqsei cunghyau ciuhnduj mdeu — “cietcaemzgvej”, ndawde 《fouxcaemhgvej》 couh dwg gij cujau neiyungz ngoenzciet de. Ciet Vwnzva Fungsug Ndawbiengz Caemzgvej Bouxcuengh Dahraemxhoengz dwg ngoenzciet cienzdoengj daegsaek Bouxcuengh gagmiz, daengz seizneix gaemq miz 1000 lai bi lizsij, bi 2005 ndaej lied haeuj buek daih’it guekgya gaep feihvuzciz vwnzva yizcanj mingzloeg, caemhcaiq soengq hawj le “Cungguk cietgingq ceiq miz daegsaek minzcuz” “Cungguk cietgingq feihvuzciz vwnzva yizcanj ceiq ndei”, baenz dangdieg mbawmingzcoh daegsaek lijyouz mizmingz ndeu.

《Fouxcaemzgvej》 Bouxcuengh caeuq gij yisuz ciuhgeq ityiengh, daj biengz vunzloih ciuhnduj cienz roengzdaeu. Seiz ciuhnduj, vunz ciuhnduj Bouxcuengh haeuj daengz dajndaem vwnzmingz le, youq ndaw vanzgingz seizde, daj ndaw saedceij, guhhong rox daengz duzgoep swenjheuh caeuq raemxfwn miz gvanhaeh

maedciet, itbuen cingzgvang lajde, duzgoep baez swenjheuh, couh byajraez fwndoeq; gij dieg duzgoep lai haenx, gomiuz baenzbingh fatnon couh noix, soucingz couh ndei. Ndawbiengz riuzcienz ndawde, vunz ciuhnduj Bouxcuengh nyinhnaeuz duzgoep dwg dahlwg saenzbyajraez, dwg bouxsawj saenzbyajraez baij daengz ndawbiengz bouxvunz, mwh vunzraeuz muengh fwndoeq, couh lwnh hawj duzgoep, duzgoep couh doiq gwnzmbwn swenjheuh, saenzbyajraez dingqny duzgoep swenjheuh le, couh roengz fwn hawj vunzraeuz yungh. Baenzneix, youq ndawsim vunz ciuhnduj Bouxcuengh, duzgoep couh dwg ndanglawh bouxsawj, cungj gig aeueiq gingqcungh duzgoep. Ndigah, youq moix bi ndwencieng satbyai daengz ndwengeih co yaek dajndaem gaxgonq, dieg Bouxcuengh cungj hoenghhwd banh gij hozdung caeqbaiq duzgoep, comz gyoengq saimbwk rengzak caez diuq fouxcaemzgvej angqyangz haenx, mbaenj daengx bi rumz swnh fwn yinz, haeux ndaej fungsou.

《Fouxcaemzgvej》 Bouxcuengh dwg cungj foux ndawbiengz ei yiengh yatdiuq, byaijdoengh duzgoep ndeu, gij yiengh doengh de dingzlai dwg yiengh duzgoep byaij caeuq yiengh

duzgoep yatdiuq, youq mwh byaij diuq doenggvaq fwngz, ga, gyauej caeuq hwet niujdoengh, gienjgiet yienhsag, goqsingq daegbied, yienghsiengq mingzbeq, mizyinx raixcaix. Fouxcaemzgvej itbuen miz “foux gyongnaeng” “foux goep okseiq” “gepbenj raez gingq goep” “foux baiq nyenz” “foux ndaemnaz” “foux ciemzgyaj” “foux hoh fungsou” “foux rauqnaz” “foux dwkbya lauzgungq” “foux dozmae daemjrok” doenghgij neiyungz foux neix, baijok le gij yiengh daegbied duzgoep caeuq guhhong vunz ciuhnduj, hawj vunz yaenqsiengq laeglwd.

《Fouxcaemzgvej》 Bouxcuengh aeu gij yiengh ndangdaej doengh diuq lai cungj lai yiengh youh yinx vunz haenx, lwnhgangj le gij vwnzva cienzdoengj caeuq lizsij gyaenanz Bouxcuengh, caemhcaiq cugboux hwngfat baenz cungj hingzsik biujyienj ndeu, hamz miz gij singqcaet swnjciep, cienzboq, dinfwngz, vwnzva, minzcuz, de ndaej swnjciep, hwngfat caeuq cienzboq doiq saenghwnq cingsaenz Bouxcuengh, cauxguh yienghsiengq daegbied Guengjsae gagmiz, hoengzyiengz vwnzva minzcuz Guengjsae miz yienhsaed yihi hungloet.



▲ Foux goepgvej hoenx nonhah.



▲ Foux goepgvej ok doengh nonhah raeg.



▲ Foux goepgvej henhoh doenghnaz.